

四庫全書

集部

欽定四庫全書

集部

燕石集卷五
六

詳校官編修臣曹錫齡

中書臣劉源溥覆勘

覆校官編修臣吳壽昌

校對官學正臣卜維吉

謄錄監生臣劉本立

欽定四庫全書

燕石集卷五

元 宋聚 撰

律詩

五言

秋日寄牛農師

別酒記春深秋來少
信音出門誰共語
策杖祇幽尋晴
葉因風墮寒蟬著
露吟荆門霜落早
離思亦難禁

同十七弟訓南城訪友不遇且聞將有金陵之

行

芳徑暴橋西徘徊白板扉家人出簾語小季掉鞭歸榆
英晴將老楊花晚漸稀仍聞欲南棹情思愈依依

送張光道歸洛中

惆悵都門道還家又布衣著書毛穎秃歸隱蕨芽肥南
陌經春雨西

闕

聽誰復理金徽

馬伯庸淮南別業號石田山房指韻求詩仍依

次用

窈曲愚公谷縈旋戴氏池人從西掖召文任北山移畦

稻收新粒巖花艷故枝地因人愈勝心共景相宜戶晝
孫常閉園春董不窺紛華忘世變衷素付天知暗篠藏
仙客喬林叫竊脂淮流紆大帶楚岫作修眉輞水堪摩
詰樊川稱牧之山房空蕙帳猿鳥望歸期

太學生劉君定挽詩二首

君定西域人延祐七
年中大都鄉試是歲

冬客死京師其父母時在浙西蔡思庸字有道陳可久字宗得皆胄子之翹楚者是歲并
亡故
及之

歲暮當風雪喬松偃澗阿丰儀思蘊藉文采失中和前

日陽春曲今朝薤露歌天高鬼神惡此世定如何

蔡子乘虬去陳生跨鶴征人方憐二妙天遂奪三英稚
弟攀輻哭羣公執紼行庭闈四千里悲動浙江城

漢陽拱北樓

世祖開寰宇遐邦寢甲兵賢王遠曠僻中國慕升平鳳
詔疏恩闕錫命榮白茅分赤土文組耀華纓北極

羣星拱東溟衆水傾五朝嘉篤懿百代述忠貞戎幕招
僚佐書幃下友生堯仁天廣大漢道日昭明德重心逾

小功深寵不輕朱軒臨巨鎮畫戟照高閣執玉雲霄近
吟詩江漢清蒼穹秋摩鵠碧海夜翻鯨竹帛垂丕績衣
冠播盛名長歌有餘興誰識曳裾情

盧疎齋趙平遠小像

盛德不孤立鉅邦尊二賢盧翁官察訪趙使職旬宣契
分元偕白襟期甫暨虔柏森松競秀珪瑩壁相聯高誼
雲霄外清標几杖邊句枝時絡繹盃筭日纏綿宵候丹
砂竈秋鳴綠綺絃嶽躋同謝屐湘泛共膺船釀酒矜方

妙裁衣鬪品全教嬉驅駸裏笑詠撫嬋娟密邇通家好
留連對榻眠閑常習靜揮塵或談玄開矣山中相脩
然地上仙儀刑人倏逝丰度世爭憐肖貌開光霽垂名
著簡編精神棲落月思致薄凌煙豈直江潭重應齊宇
宙傳長沙多勝境並祀待他年

挽嶺北省郎中蘇子寧

真定人

河朔多奇士樂城有令孫策名遊宦海行慶出儒門兩
府推曾掾羣公聽討論天池鵬遠擊雲路鶴高騫騰達

初云邁馳驅豈憚煩河汾一白簡江浙兩華軒吏牘機
權密官聯體統尊流亡藉安集註誤得平反材器梗楠
聳曾襟雲夢吞北藩曾入幕南國復攀轅夙望存臺閣
聲能著塞垣芸編嚴子訓芝檢答親恩顯達逢昭代荒
涼憶故園脩程車騁轍厚福水流源政撫青霄立俄瞻
素旆翻佳城儼新市搔首賦招魂

送楊惟肖

字與似

浩浩岷江水循循蜀郡人山川賦清淑弦誦襲真淳

秀年華盛

闕

學業新金鐘懸彩簾玉樹照青春翰墨

資者舊才猷怨隱淪前時辭下國指日問通津懷土心
雖切觀光氣遂振鯨魚騰碧海鷲鳥擊蒼旻識鑿滋無
愧因依得可親吾儕陪客次汝伯實儒珍促席襟期密
知音笑語頻悲歌忘宇宙慷慨惜風塵愛爾情俱似而
今意愈真閒門車馬集奧室簡編陳會合時難久漸摩
德有隣三年曾刻楮一旦忽思尊自分燕椎鈍深慙越
女曠贈言申繾綣別酒話酸辛時世文明日詩書少壯

身重來偕計吏何用苦傷神

同年小集探策賦詩得天字

仁廟尊儒術嘉猷匹古先丕承由列聖大比涉三年揀
拔歸陶冶招徠際幅員文星明似月公道直如弦世運
逢熙洽吾儕屬引延兩班延虎拜多士出臚傳恩重冠
裳賜銜清館閣睽綠章趨畫闕華服曳春筵載酒芳垆外
聞歌小海邊歡娛能幾日去住不同天文省搞辭麗容
臺執禮虔四門崇教育庶府雜周旋桂玉悲妻子塵埃

厭市塵緬思州縣職恒畏簡書愆苦樂寧非分升沉各有緣雲隨風力斷萍逐浪花牽幾聽宮鶯嚙頻驚海月圓重來情翕翕復會語綿綿問夢觀青鬢遨嬉駐彩韉但思傾玉笋那復計金錢發興分奇韻抒懷託短篇勤勞有王事關諸賢

和真人所居雲州金閣山有異香

真人持玉節高居坐廣霞風度三山杳香聞數里賒氤氳翠羽蓋倚旒斑麟車無緣訪玄跡應赴蔡經家

送姚子中參政江浙行省

時浙省平章曹某罷免

文學蜚騰早中朝踐履多嘉謀思妥帖直道忍婣媿物

議和

闕

鈞陶

嶽峩鳳池春入幕象魏曉鳴珂蘊藉

登醇酒輝光厲太阿久勞裨國政暫出省民河眷注恩
何厚操持行不頗牙旌辭紫禁鷁舫下黃河竹樹供圖
畫江湖入詠譎金山訪蘭若赤岸繫狎狗館傳雖豐飾
登臨得幾何自公方變魯視事肯隨鄴保障逾閩海征
財及茗齏民居散鴻鴈水患助蛟鼉恤匱施仁澤搜賢

置禮羅贈言徒感激報政敢蹉跎去國時寧久辭鄉語
漸訛殊方善調御趣召鬢雙皤

從駕觀承天護聖寺

至順二年五月

陪駕西郊外遐觀倦未還荷深七里泊雲近五華山境
勝嗟來暮官微愧不閒憑高歌夏諺直擬重躋攀

送蘇伯修內翰南臺御史

若人抱竒璞柱史稱高情含霜趨建業踏雪過蕪城奮
彼澄清志違此交友盟相思祝餐飯貞哉保令名

送方公亮揚州教授

莫作蕪城賦長歌藻泮思盤滄陳首耆虛座擁皋比彭
蠡家何近漳江權不遲春城且冰雪能忘別離時

靳士昌宅前大樹

百丈門前樹多曾閱市人斜梢侵寺塔直榦闢城闈喜
映龍樓日愁栖馬市塵何時濯枝雨老翠尚能新

送江東貢有源分韻得庭字

以著書除學官

聞說宣城郡名家聚德星因君詣京闕如我到門屏畝

畝知聞道詩書出過庭歸航有毛檝不負世明經

寄題水木清華亭

僻地開三徑荒山住一翁棲遲瞰澄澈結構倚葱蘢
檻穿黃蝶芳塍散白縱雲湫龍恍惚月砌鶴氄氄破曉
孤村日號秋萬壑風溪流明見底巖樹潤通中曳杖行
霜果褰衣檢露叢稻花香入戶杉葉勢侵櫬獲罷平川
迴樵歸狹路窮嵐迷峰上下泉合澗西東陂養魚千石
秧移地百弓收成防雀鼠種植聚奴童薯蕷登秋課禾

麻驗歲功要賓如鄭驛遺子似龐公物外心何遠朝中
信不通坐從書帙亂飲拚酒尊空景物樊川似生涯輞
口同嬉遊未可到賦詠或難工

遊崑山慧聚寺和唐人詩二首

碧雲天一方休公具禪牀天女散花近懶殘煨芋香殿
燈耿寒炮波月澄冷光願言謝朝紱托身栖道場

右孟
東野

韻

天外山光近峯顛海氣吞潮憑風作陣雲藉石為根鳥

重烟藏樹帆多水遠村凭高暫詩酒回首望脩門

遊虎丘回宴舟中

名郡值佳境良朋諧勝遊閭門暫弭節虎丘同汎舟岸
莎欲佐舞波魚能聽謳對酒寫高興不樂復何求

送張謙受歸天台

客路五千里三年謁帝居新豐空對酒光範不投書高
興尊鱸外清標翰墨餘臨岐贈詩句惆悵欲何如

崇天門即事

久綴鷓班底逶迤曉思遲偶因迎冊處却憶唱名時御
水流故道宮花換舊枝自慙無補報四十鬢先衰

兵部侍郎王崇道出守東平

使君朝著久暫出守名城祇羨黃堂貴能忘粉署榮編
民瞻闕履候吏引麾旌早寄高齋咏令人識政成

城南道院即事

六月二十八日

三徑草纖纖苔痕過雨粘風光殊不惡涼意復相兼芍
藥斜侵城蒲桃亂入簷可憐成小憩不得遂幽潛

雄州道中即事

南過新城道田疇迥不同長溝如浙右下壤似淮東塘

灤依依住橋梁處處通道傍遺老說此可治農功

賈恭人哀挽

賈郭氏其夫由征交趾為百夫長
戍杭子某代為之迎養恭人於南

既沒歸
葬中牟

彼美涵濡厚于歸樹立艱持家夫效勇襲職子承顏海
錯供甘旨河孺返珮環因嗟陳孝婦不見藁砧還

送簡秋碧河源縣尹

文墨終堪奮牙緋亦自豪身留闕下久官入嶺南高兒
子隨行李鄉鄰且濁醪長材能製錦何憚折腰勞

南城天慶寺僧雅致亭

一昔到上方塵慮能相忘鼎水他山茗爐烟異國香雜
芳供春艷佳木通夕涼不有草堂詠那聞贊公房

宛平縣尹李克中號約齋

赤縣徵呼際緇塵浩瀚間事隨紅日出心共白雲閒萬
頃魚龍海重霄虎豹關人人瞻北極處處看青山

次韻謝敬德司業冬至夜見念詩二首

歷肇羲和紀雲從太史書寒威儘凜冽陽晷漸舒徐消
息存元氣行藏問太虛茫茫千歲測坐致欲何如

陶令惟耽飲虞卿漫著書雄文莫弔屈高士不徵徐酒
肉朱門臭塵埃白屋虛古交崇節義時慕蘭相如

元夕西門外訪友

信馬出林坳因君得暫停春燈九子殿夕照百官廳斷
水冰猶白荒陂草未青遙觀陪扈處懷昔意冥冥

送明理赴南豐州判官

吳越流亡歲湖南餽餉時目前堪撫字江右少瘡痍上
佐官何美南行樂不支盛年思報國莫動別離悲

先兄正獻公墳所寒食五首

車馬自駢闐風寒復禁烟野筵惟粃粒村女亦秋千遠
岫清明雨高墳白竹錢乞墦君莫笑攫肉有輕鳶

纔動山林興遂增畎畝憂夕陰仍不雨春冷欲如秋撫
舊誰傷悼乘時盡醉遊農家多苦旱啼殺舍南鳩

樹冷杏慳花池乾草勒芽愁吟春自淺樂飲日還斜遠
翼摩霄鶴喧傳得食鴉城中火宅苦吾欲覓仙家

兀坐尋詩句豪吟引酒盃悲歌常激烈暗咏亦徘徊詩
向眼前得興從天外來成章多坦率猶待故人裁

三日春郊宿留連不肯回尋詩乘款段步履踏莓苔勝
境僧多占深村客少來明朝入城市那復好懷開

送王君冕歸長安

去國三千里登科二十年盍簪方晤語分袂忽言還書

帙休晨檢詩筒息夜傳更無吟偈側惟有恨纏綿

遵化縣感懷書事二首

巡歷京畿東道

驅馬出京華疲民盡怨嗟孤臣難報國老客不思家
釀雪觀雲氣占風看月牙翻思未遇日嘯傲寄烟霞

有疾不飲酒無悰難賦詩豪強妨撫字姦黠玩鞭笞
廢堞羣鴉集荒山雪意垂庭前一瞻眺聊爾當遨嬉

宿安平驛

按行河南四道

屋西山氣合門外竹光浮總為襟懷敞不知行役愁
清

時少詞懇樂歲美田疇帝力知難報猶須動隱憂

南漳縣留題

錄因襄陽

寂寂南漳縣熙熙稍可居水流穿町疃山色瞰階除木
槿能紅白芭蕉半卷舒訟庭無判牒聊復寫清虛

窓下有白

槿威
開

均州順流之光化縣舟中作

岸澗漸無山波平頓少灘魚來晨艇集穀熟夜廬看野
處民生遂江行旅思歡仍聞囹圄靜尤覺老懷寬

襄陽

暫駐襄陽府懷賢一惘然
留名墮淚石得計遺安田
醉聽攔街唱饑餐縮項鰭
詩人亦痴絕四美欲兼全

江濱行祠

曉出楚城東叢祠肸蠁通
沙高淤象嘴波靜闕龍宮
吳蜀源流遠羶沉世代同
所祈無漬決相我歲年豐

象鼻嘴沙

岸之以形
似名者

四月晦日即事

金史曰... 卷五
暝樹俯疎櫺陰濃簇廣庭連綿送月雨歷落照泥星好
友違千里痴兒昧一經近來忘百慮恬淡養遐齡

復迴下外朝山行白浪道中二首

惴惴均房道重來又數程步溪愁石坎苦雨畏雲行履
險神魂散忘私性命輕回車從小憩呼酒賀更生

徑路紆餘出沙灣宛轉流羣山中不合萬竹翠相繆椽
圃何粗鄙桃源豈謬悠境竒詩句拙摹寫媿林丘

李清卿遷椽淮東

舟時已貢六察椽再娶奉母登

將母邦溝上君舟屈遠行不須生別恨所重立修名謝
絕山中險方來海上征續絃新井曰讀律古章程夜月
孤舟穩秋風五兩輕中臺辟書蚤便道易趨京

冬雨

十月楚天雨同雲暗八荒前山應是雪此地不成霜氣
混朝嵐重聲兼夜漏長閒庭斷來往幽思渺無方

枝江縣獨坐

按部峽州

澤國持龍節蒙恩備使臣簡書時自理燈火夜相親山

雪迷殘臘溪梅借早春所憂無異政何以慰斯民

環翠亭述懷

至正元年正月

江縣閭閻合池亭水草交紅梅過年蕊綠竹隔牆梢清
興詩聯集微疴酒盞拋何能遺世累雲外結松巢

次前韻寄蘇伯脩韓大雅

園令常多病嵇康欲絕交遊魚躍江浦宿鳥聚松梢遠
志何時遂閒愁一昔拋故人多顯達阿閣鳳皇巢

太古詩

并序

高昌拜住太古後至元丁丑拜御史廉直有
令聞汝寧民羣作亂君奉命治其獄無冤濫
久之劾一巨姦忤權臣二年不調庚辰春權
臣敗始遷山南憲副為御史與子同僚嘗為
太古字說今來山南子亦僉憲
事再徵鄙言因紀其事以贈

宇宙萬年外汗隆百代中時艱崇謫詐世降逞姦雄效
職心如石攻邪氣似虹如君多布列庶可返淳風

高山道中早行

五月高於道驅羸戌夜行萬山分地色千澗混雞聲野
磴乘機置山田冒險耕浮名致萍梗吾亦歎勞生

閩鄉道中

風雨度峭岵新晴喜若何雲間瞻太華馬上看黃河心

已為形役身兼抱病多平生遠遊志垂老漸銷磨

商洛秦陝

步步皆陳蹟亦猶山陰道中使人應接不暇長安城中
碑刻亦不能徧覽况近郊乎雁塔梯級久廢曲江在其
東而亦久濶一登含元殿故基未央宮在漢城忽遽不
及至但求得一瓦而已興慶池廣袤五七餘里荷菱藻
芡彌望岸旁古垂楊甚多東南白鹿坡甚近華萼相輝
太真梳洗等樓基皆儼然僕始至及還諸公迎送皆在
長樂坡滿橋嘗一過滻水嘗一過華清一浴繡嶺一觀
華陰顙靈宮并嶽神題名歸程過藍關秦嶺宿藍橋觀
裴航洞上七盤嶺下瞰輞口莊商山拜四皓墓及廟外
此皆不暇及也予年來行四方見山水頗多然各有可

取至於長安城中望終南山天下古今妙絕也惜病多才劣且奪於宴飲不及富於吟咏

送王止善廣東市舶提舉

嘗為兩浙運司及海道府幕官

送子炎方去臨岐發水嘆如何醫國手祇作理財官
晏商颿盛風清客枕安番禺天不遠佳譽徹朝端

送馮公厲江浙叅政分題得揚子江

萬里岷峨水維揚會衆流雲濤傾楚尾天塹壯吳頭
北固山光近南泠水品優離亭風笛晚古寺月鐘秋
袞寫承新渥旌麾鎮上游瘡痍煩撫定景物肯淹留
瓜步堪

凝眺蕪城動別愁
江波深更濶
應似廟堂憂

清苑張節婦

遺腹子某今為左衛幕官節婦八十容城人

一綫艱危路
伊人亦自賢
蘭芽始撥雪
桂子已參天
苦節年齡永
衰宗福澤延
一時華表柱
千古柏舟篇

徐元庸寒泉廬

孝子終天恨
寒泉未足云
水漿不入口
鹿豕與同羣
手綫今何在
杯棬豈忍聞
素冠曾有刺
珍重守孤墳

送張掌儀詩

并序

先正立國子監學規選伴讀生謹厚練達者
二人克掌儀凡春秋二丁洎吉月釋奠先聖
弟子執贄見先生旦夕揖拜一切禮節悉隸
之束鹿張中德被選充是職者三年一日謁
告歸省諸生慕其謹厚練達且近歲間有不
得善去者咸惜其往賦詩以道其情司業宋
賢高諸生之誼畧敘
其槩而系之以詩

之子寧親去橋門忽別離一時分祖餞六館重威儀鄉
國青山近宮牆白日移功名已在望菽水未妨遊

至元三年六月八日史局作休從伯京御史公

亮太監伯溫祕卿伯循待制暫至城西祕卿

待制別去伯京歸家予遂借公亮回憩都水
監雙清亭監掾平伯欽留飲即席賦五言十

八韻

皇都官曹盛銓衡簿領優公庭臨紫陌賓幕對滄洲樹
影移門暗荷香曲榭幽亭臺分錯繡車馬去如流市迴
塵聲杳山明霽色浮廣寒南聳殿齊政北瞻樓心遠逾
寥廓身高不自由茶瓜延永晝締綌借清秋翠牖何勞
扇珠簾不下鈎冰盤丹果沈

去聲

石枕碧苔留浪迸頻跳

鯉萍開緩泛鷗畫船思蕩漾紅粉

闕

哥謳竹葉生高興

甘棠敘舊遊主人供飲饌勝景得綢繆洗硯惟呼僕移
床屢召騶史才慙忝預詩句費冥搜睽壁知何在乘騶

計少休詰朝重赴局持此詫同儔

公亮泰定間嘗
丞是監故耳

贈墨工魏元得

煤麝搗魚胞居然品格高劑傳龍髓記香出豹囊韜詎
可飾昭應唯將錄楚騷多君遠持贈詩句少酬勞

宋祥
符中

治昭應宮用廷
珪墨為飾染

欽定四庫全書

燕石集

六

送蕭同可之肇慶照磨

吉州萬安人

遐方殊不惡幕府獨賢勞客路離鄉近官資過嶺高溪
清石可硯颺息海無濤此去騰芳譽公車薦剡操

送李惟中西臺侍御史分題得長樂坡

秦東有古坂一舍近重城已脫峻函隘仍瞻灞澹清柳
條前歲別草色蚤春迎舊路平如掌乘驄自不驚

絕句

五言

友人借書為科舉文檢閱戲書以答之

一笑鶻搦兔終朝懶祭魚秋闈與春試却用郝隆書

公安道中

碌軸如醉翁深春卧晴綠坳徑露不乾下有蚯蚓哭

小景扇

桂楫寒烟浦茅廬老樹枝畫圖嗟歲暮不及見春時

訪僧不過題壁

莎草沿階密篔簹繞檻幽禪床太清絕聊待碧雲休

子昂風竹橫披

筆意出天機，翛然仰復低。稍須風勢定，應有鳳來棲。

採蓮小景

蓮華被君採，蓮實被君折。相牽俱如絲，如何能遽絕。

仇雲軒訓其子彥中廉訪三絕句，其孫今御史。

公度持以求詩

柳玘著家法，馬援述交情人。稱世濟美，誰謂公慚卿。

三鷺扇頭

欲下勢翩翩，對立羽肅肅。風標儘瀟灑，其奈股無肉。

送高句驪僧式上人東歸二首 號無外

師從東國來却返東國去能操無外心何不中國住
暮餐城南粥朝踏城東塵道人心似水去住本無因

送國子生吉祥海涯還蘄州覲省

少年住京國思親不暫停豈伊居庸翠不及楚山青

磨石村口號 穀城道中

偃柳礙行騎山家少憩時黑雲催上馬不省主人誰

分憲後圃二詠 襄陽路

秋桃實纍纍久熟雙頰赤風來墮苔徑取食味如蜜

桃

雅潔玉簪花清芬莫與比不得向陽栽植根北窻底

玉簪

公安早行

誤聽野雞鳴揚鞭趨驛程平明見茅屋方覺冒霜行

燕石集卷五

欽定四庫全書

燕石集卷六

元 宋聚 撰

律詩

七言

都城雜咏

四首

萬戶千門氣鬱蔥
漢家城闕畫圖中
九關上徹星辰界
三市橫陳錦繡叢
玉盃丞相府
珠幢寶刹梵王宮
遠夷縱睹爭修貢
不用雕戈塞徼通

豪傑紛紛白玉京
汗顏血指戰功名
九重見帝多因鬼

萬里封侯不用兵，肥馬塵深心獨苦。
鮒魚波涸事難平，西山小隱煙霞暗。
依舊春犁趁雨耕。

風物鮮妍飾禁城，豪家戚里競留情。
花圍錦幄清明宴，香擁珠樓乞巧棚。
叱撥馬搖金轡具，併蒙車颺繡簾旌。
他年定擬持鉛槧，細數繁華紀太平。

流珠聲調錦琵琶，韋曲池臺似館娃。
羅袖舞低楊柳月，玉笙吹綻牡丹花。
龍頭瀉酒紅雲灑，象口吹香綠霧斜。
却笑西隣蠹書客，牙籤紺帙費年華。

聞駕幸開平不獲瞻仰悵然有作

雲表浮翠漾朝暎舜陞雍容引紺轅駝鼓一聲離闕館

龍旗小隊駐花園空聞祝輶西華道不及瞻天建德門

自是承平好行幸薰風無乃聖躬煩駕出則駝上鳴鼓謂之駝駝鼓花園

在都城之北駕北上每駐驛馬

明照坊對雨

章臺車馬去如流白雨霏烟拂畫樓九陌平鋪明似練
兩溝急瀉碧於油美人虹見西山霽少女風來北里秋

涼意滿襟簾幙捲宮鴉歸樹夕陽收

壁月

壁月悠悠上女牆六街燈市遠微茫隨車徑去柳家婢
走馬獨歸韋氏郎戚里烟塵眩銀海九重宮闕接瑤光
銅駝陌上聽鼙鼓笑殺西樓白玉觴

延祐七年十一月朔小雪既上英宗皇帝入太
廟祀享致齋萬姓瞻仰喜而賦詩

五夜飛花合御溝鑿輿拂曉建龍旂千官玉珮開黃道

九陌瓊枝照綵旒皓色潛消鳩鵲殿清光欲近鳳凰樓
遙想齋宮祠祀罷天恩應共海波流

上中書張叅議

至治元年有旨命禁中結燈山
有司具圖已進時濟南張公希

孟叅議中書省上書諫從之且賜錢
若干辭不受遂賜繅帛各一以旌之

中官傳敕構鰲山公相披雲犯玉顏紫府騰書天咫尺
彤庭賜帛錦爛斑丹心濟世今能遂白髮歸田未可閒
早晚傳宣催大拜更將霖雨膏塵寰

送高子敬歸彭城

元龍不拜富民侯，袖劍囊書苦掉頭。
李愿有心盤谷去，阮咸無意雒中留。
春城寒食鶯花靜，日暮鄉關汴泗流。
我亦拏舟江海去，試從沙鳥問黃樓。

寒食暫出

一百五日上街頭，半晴半雨天悠悠。
豪家出郭車爭道，少婦當壚人上樓。
輦路暗生芳草遠，御溝平瞰碧波流。
少年直把春償酒，若箇新詩紀勝遊。

哭張惟健

惟健濟南張公希孟之子，賢而有文，才識通敏，羊儀俊秀，禮法從容，好古。

物善草隸諸書當
時之名公子也

天風吹下玉魚符絳節颺輪下玉虛人海渺茫思衛虎
士林憔悴歎曹蜎紛紛故物塵凝座寂寂春魂月滿除
珍重尊翁休痛哭郎君方代少霞書

衛御史

故西臺御史平陽衛弼字良佐延祐初
以列郡守忤貴近意由是有旨罷西臺

良佐遂歸亡何薨後數年識其子靖卿靖
卿席世賞得官亦氣節凜凜有父風云

御史昔乘青驄馬霜氣橫秋烏府門太白終南讓高峻
涇流渭水分清渾神隨丹旆歸全晉名入青編紀大元

欲識當時真鐵面只今猶有鳳皇存

通州晚晴即事

南遊湖湘

水榭空明雨脚收凝笳催上驛亭舟紫霞爛剪翔鴻錦
碧草平鋪集翠裘落日關河初客路浮雲宮闕上神州
誰憐五色江郎筆真使超然賦遠遊

檣港夜泊

七月六日立新秋船窓風露涼蕭颺神祠擊鼓鴉集樹
水驛通燈魚傍舟身在江湖頻北顧眼看河漢近西流

遠人爭問京華事為說夔龍佐冕旒

江上夜泊遇京使回却寄都下諸公

風氣涼涼水氣清白榆如玉絳津明橫江渡口晚潮退
米石磯頭涼月生遠道迢迢蝴蝶夢舊涯歷歷鳳皇城
羣公奮翮青雲上應笑扁舟萬里行

書湘陰謝使君廳壁

使君廳事冷於冰使君無家靜如僧門樹枕街橫暮犬
戟枝當戶照寒苒僮奴伍伯隨陽雁曹佐書司被凍蠅

料得太常齋未足玉珂朝馬去飛騰

湘陰為湖南下州而謝君敬德三年

未嘗挈家故云爾也

雪中遊洞庭

楚酒初開臘甕邊湖船遙指暮山前
鄉關迢遞不歸去身世伶仃時自憐
雨雪還須送殘歲晴明應是入新年
陽和咫尺烟花媚却寫春光被管絃

除夜宿武口驛憶誠夫兄

瓶笙榻拙淡無聊幾度他鄉遇此宵
三十男兒尚書劍

尋常意氣自雲霄
風燈直下漁歌亂
斗柄傍連帝闕遙
懸想銀臺門下客
聽雞忙赴紫宸朝

初冬之先壟卽事

至治三年作先壟在南
城之東南宜泉村沙堡

烏鵲相依啄野田
白駝對立飲冰泉
蒲洲凌薄車旋濤
棘路沙虛馬懼鞭
冢上白楊時獵獵
苑中紅葉曉翩翩
嗟予謾索長安米
願就耕夫受一廛

登第詩五首

泰定元年甲子

宗天門唱名

三月吉日當十三紫霧氤氳闔闔南天子龍飛坐霄漢
儒生鵠立耀冠簪黃麾仗上清風細丹鳳樓頭曉日酣
獨愛玉階階下草解將袍色染成藍

恩榮宴

四月二十六日

上相傳宣弁闕趨玉堂西北拜鑾輿歌聲縹緲方壺外
酒味氤氳沆瀣餘幕額錦光晴爛漫帽簷花影晝扶疎
君恩誰識深如海獨倚東風咏藻魚

同年會

四月二十九日海岸之萬春園

臨水亭臺似曲江同年人物宴華堂
嬋娟笑弄龍香撥
醜醜深涵鳥羽觴
醉後方言頻爾汝
座中除日互平章
從來期集輸京雒
仍見詩歌播八方

賜章服

自是年始幘頭袍帶靴銀木簡皆具簡上仍刻御賜字金填之五月一日皆除

書同
授

承平天子重科名
章服分頒出大明
袍是涿羅香縷細
笏勝楷木素文橫
晨趨象魏雲霞粲
夕奏龍墀玉雪清
遙想鳴珂朝會處
鸞行爭訝被恩榮

上表謝恩

五月二十一日時駕已北幸

瑞日鮮明射玉題
華袍綵繡近
呆恩舍人宣贊
瞻丹闕
新進趨蹌詣赤墀
黃屋雲行天杳邈
綠章風送路逶迤
湛恩豈許須臾報
要見他年獻納辭

海峽春行

越橋西下苑牆高
綠染垂楊絳染桃
霞擁玉樓晴啟戶
風生瑤海暮翻濤
官因立馬看花擔
漁憶聞鶯罷竹篙
唯有杏園春事好
幾人詩興似吾曹

送朱仁卿盱江覲省

晴霞紫陌忽逢君，暫託塵衣訪白雲。
上國離人心草草，北堂慈母夢欣欣。
波衝海淀漳川合，舟入鄱陽楚路分。
珍重驛程詩句好，不妨馳寄慰離羣。

和張仲容雜詩

蓬萊雲彩爛東方，魚鱗開門禁漏長。
萬仞樓臺爭霽色，九重宮闕動秋涼。
羽林執戟趨神武，騎客影纓入建章。
獨愛芸窗常寂寞，六街車馬是誰忙。

時予初校書祕府

誠夫兄由兵部員外調選江湘次留別詩韻送

之

鯨鯢吞餌釣槎閒英蕩開承使節函北地闕河搖落後

東吳風物笑談間晴湖泛艇鷗衝葉夜邸懸燈馬卸鞍

莫以遨嬉夸小季春風今在五華山

山在京西四十里
都人四時遊觀

和趙魯瞻海岸冬日晚歸

白塔高標射紫霞烏棲宮樹客投家燒香人拜寧弓月

穿市兒攜剪彩花首着地眠朝退馬蒲桃園隔宴迴車

人生要縱長安眼何事能容便面遮

閏月五日即事

皇都萬家欲何往信馬悠悠成獨行繫纜橋邊春水急
吹笙樓外暮雲平金絲柳弱窓臨道羊角風高塵過城
取次韶華堪寓目詩情飲興一時生

寄題泆河石橋

河在澧州北四十里竇往來孔道州人謝氏疊石作橋壯麗宏

濶予自延祐以來凡八過其上慨念行役之苦為之惘然

灣水溶溶漾碧虛白虹高偃接雲衢深春曲岸栽楊柳

落日闕

含毫士莫畫寒江待渡圖

秋思書將陵驛

館伴安南國使還鄂

斜陽催出鳳皇城
津鼓聲沉夜櫓鳴
海口風來吹酒醒
漳濱葉落喚愁生
望深夕浦蒼烟暗
夢入秋闈素月傾
况是潘郎年紀到
二毛侵鬢不須驚

時予年三十二

秋浦夜泊憶誠夫兵曹兄

悠悠旌旆駐郊亭
車馬東門勞送行
啣命但知談笑樂

趣裝方動別離情
千山萬山風月恨
十家五家砧杵聲
惆悵粉闥人下馬
碧窓誰與對書檠

送哈必齊文苑僉憲浙西

五雲仙珮厭朝雞
抖擻春衣著繡衣
陌上好花晴翠歷
津頭行客路遙迤
楊梅佐酒火實粲
鱸魚作膾銀絲肥
共道莫教辜負口
不知水漿可充饑

雙清亭春日獨坐

時張為都水經歷雙清幕府名也

帝城何處不紅塵
小海危亭獨可人
筇筍舟航浮上牖

笙歌池館接西津
恩波浴鷺連洲暖
宮樹啼鶯隔岸春
不用鞭笞了官事
笑談容得幕中賓

二月二十二日野寺哭張仲容

身前誰不羨詞華
水散淪漪日散霞
仙桂無緣空種樹
幽蘭有種自生芽
淚飄舊殯棠梨葉
酒入荒臺野薺花
最是相知嗚咽處
洛中松柏渺天涯

送張孟功江淮覲省就赴河南幕

清時郎選重華年
英妙如君衆口憐
霍霍寶刀新試刃

泠泠瑤瑟舊調絃思親將捧白鳩杖去國還浮畫鷁船
淮浦汴堤俱好在吟詩仍似水雲天

送貢秦甫還江東

河流欲水燕鴈號僕夫出門具吳舫三年遊子住京國
一日念母還江臯才名豈藉功名重詞氣終隨意氣高
欲識別君情繾綣臨歧持贈紫絲絛

沙堡拜掃

一百五日侍誠夫兄出南城拜掃沙堡先壟歸循宜泉橋北少東一園內

有金太祖武元皇帝碑扁守巖秘呼主人開門讀竟憩園後小亭亭四旁植卉木成列甚

多峙二靈壁石於巽坤隅移時將出主人前
導復由碑前過一柵門旁鎖二猴云畜四五
年矣童有偶懷果戲擲調之亦跳梁可玩已
而要坐外閣茵榻簾几事事皆清致以浙甌
供茗令人洒然少頃風作命僕就懇折花主
人送出且以辛夷花詫獻上馬轉至園後適
李花盛開斤騶者踰牆竊致之遂歸自豐宜
門予偶有詩思至披雲樓成唐律一章白兄
抵海岸兄屬和已就達君實祇監求紙商
訂錄呈諸公主人周姓亦頗知好客云

風花寒食舊城陬路指灣礮思致幽沙隴致錢買鼯鼠
郊扉擲果調獼猴辛夷已受園丁獻穰李尤煩步卒偷
自是詞人多樂事繁華那識抱官囚

拜掃時野人獲鼯
醜恠可詫予以錢

七十五文得之
將以歸遺兒子

春暮雙清亭小酌懷張孟功

吏退公庭鴈鴛行持杯暫對水雲鄉
山開罨畫涵晴影
花落胭脂漾晚香
酒幟隔津標柳陌
漁舟避浪向蒲塘
懷人不得同相賞
空賦停雲第二章

曉自宦者門入院馬上口占

繚垣齊拱禁門高
別院斜連御水遙
芳草有情生廣掖
垂楊無力倚危橋
承宣白面風標俊
入內華裾意氣驕

么麼詞臣不通籍却疑宮闕在璇霄

病暈東王君寶太博

卧病三日如三秋時見謝程蘇孟儔環堵自疑溟漲外
高居獨在閩山頭醫師眡視投苓朮文友過從遺脯脩

獨怪新除齊博士不來相問負薪憂

謝敬德程時叔
蘇伯修孟道原

送道士李希白遂山

洞中流水五芝肥鶴上仙人萬里歸海月伴殘丹竈火
天風吹動繡雲衣焚香祕室招王遠躡屐名山訪子微

聞道長生有真訣我從何處叩巖扉

和蘇伯修應奉上都試院夜坐韻

八月簾帷試夜寒諸公文酒度更闌然藜共喜臨天祿
分芋何勞問懶殘誰許桂枝平地折莫將花樣近來看
主司不是冬烘者解送宜勝十政官

送誠夫大監兄代祀海神

毳帽貂裘素綺裳明時遠致御封香朝端使者傳天語
海上神君見火光萬弩射潮非計策三山湛影漫文章

靈來細祝憂勤念不是求仙漢武皇

送劍州任倅

愛君疇昔賦遠遊志如鵬鷄橫霜秋抱才應辟到滇海
挾策赴調趨皇州蜀山秦樹有德色猿聲鳥道無羈愁
里中同舍不做僮坐守塵編空白頭

詠御溝

泱泱穿雲出澗初千迴百折到皇居行人不敢來飲馬
稚子時能坐釣魚內史府前晴澗瀆雲巖觀後晚舒徐

波漫略約通丹禁風颺輜軒映畫裾三月霏烟著楊柳
九秋涼露泣芙蓉荒唐莫說流紅怨自是清連解起予

送益陽州守額森哈雅

楚武定公阿爾哈雅
之孫由宿衛初官

龍節光臨澤國遙鳳毛聲振相門高朝辭闕陛香凝袖
暮餞郵亭酒污袍我愛甘棠留楚甸誰憐楚鴈集江臯
一州如斗君休薄考最猶能張爾曹

送賈孟善闕浙覲省遂奉父之官淮安

浮雲一昔涼風起遊子匆匆買去舟喜奉嚴君辭遠徼

不
因
作
客
別
神
州
白
蘋
漠
漠
吳
江
岸
紅
樹
蕭
蕭
楚
驛
樓
總
是
停
橈
捧
觴
處
知
君
無
復
有
離
愁

次韻誠夫兄麗正門外晚歸

碧
霄
雲
物
獻
詩
題
雙
闕
西
邊
日
馭
低
弦
月
彎
環
城
上
塔
錦
霞
鮮
麗
水
南
隄
仙
郎
下
直
辭
雞
樹
獵
騎
收
圍
撤
兔
蹄
爭
笑
閒
身
空
七
尺
不
因
葵
鼓
卧
幽
棲

柏堂

劉母熊氏三十而寡不嫁其子觀作堂名柏以奉之

到
處
慈
闈
總
樹
萱
君
家
庭
院
擁
蒼
官
心
非
紅
紫
爭
春
意

人似青蔥耐歲寒錦帳羅襦秋折鳳雲窓月戶曉棲鸞
堦墀更有芝蘭在掩映濃陰十畝寬

南寧彭使君重建東坡載酒堂

儋州

椰葉椰花映祠宇椒漿桂酒蔥肴蒸古人不作千年恨
遺跡猶存百代徵魂魄何須歸玉局是非從此見金陵
使君作室吾儕咏一笑俱成附驥蠅

蘇伯脩脩撰分院灤陽衆仲

陳

君實王有詩送

行讀之灑然動人清興走筆擬之

桑乾居庸南北京峭山澗水相送迎羨君於茲三扈從
憐我不得一經行到時文酒度長晝去日車馬奔新晴
鰲峰清語應見念使僕鄙吝心中萌

琴士項崇節還新安其人居京師七年嘗為威
順王及魯國長主琴

調絃理曲世滔滔百代斜川鑒識高有耳唯聰廣陵散
無生不奏鬱輪袍長安米索塵凝席千里尊香月滿舫
恐道醉眠卿且去玉徽明日楚江皋

早春馬上即景書懷呈張孟功左司

日日騎馬到西城年來竟無清興生冰潭照影覺形穢
雲岫對人增眼明墨客詞流驚邂逅玉珂香轂惱逢迎
鳳池賴有知音客一曲陽春為寄聲

歐陽南陽還臨江便道之官廬陵幕府

前翰林
檢閱撫

州錄
判

東觀玉堂如積薪十年補外空勞神紅塵赤日能敗興
白鷺滄洲却可人相閣老槐涵墨沼官亭新柳送車輪

扁舟三月桃花浪歸及臨江江上春

送李彥方福建憲副

繡衣乘遽度閩關回望皇州紫氣間
輟直暫勤安赤子臨歧誰敢嘆蒼顏
陛辭此日嚴將指疏奏明年早賜環
自是輶車不游覽往來多駐武夷山

道士王用亨父母高年作壽慶堂其上世蜀人
仕宋今居江東

雲錦溪頭小有天崇文宮畔地行仙
故家喬木三千里

流水桃花五百年雲液養齡春
漱灑霞衣上壽晚翩躚
山中玉斧傳真訣應向高堂說又玄

暇日小集項鍊師丹房

鍊師字子虛

新秋道院涼如水載酒幽人對綠莎
移榻小窓從嘯咏
抄詩別館儘經過勞生不解談丹鼎
明日堪憐動玉珂
吟罷自慙題字惡定應無計換羣鷺

和孟景章早秋即事韻

蔥籠仙桂壓勾欄月下婆娑玉臂寒
荷榭有風紈扇歇

醉鄉無暑蔗漿殘銀燈光散填河鵲粉袖香銷舞鏡鸞
惆悵邊衣何日就錦書同附勸加餐

李良臣之睢陽別業為其考平叔公作家廟予

校書時李為祕卿

憶昔青衫典校時尊翁作監鬢垂絲蓬山風月誰能記
蒿里衣冠我獨悲黑壤未麻存別墅素帷香火待佳兒
舊僚猶有丹鉛筆試撰麗牲第二碑

送藝文令史宋子與驛召歐陽原功太監湘中

便道過家覲省兼簡吳彥暉徵君內翰周子
嘉省郎

風雪閉門貧病嬰開門南去愜我情萬里獨遊舊官長
十年一拜賢父兄征路快馳宛騷裊歸期應及閏清明
梁園楚岸春俱好一訪相知為寄聲

江西表慶遠由郡博士為幕職再調潮州路經
歷徵詩送行

長松礫砢出霜林不分儒官久陸沈嶺外官資雲路快

城南祖帳雪泥深紅蓮綠水無多事翡翠明珠肯動心

莫道皇都

闕

南岳李煉師所居號盤中

南岳峻嶒倚太空盤中勝地著渠儂烟霞近接朱陵洞
雷雨潛通天柱峯仙境得名符古昔道人無事養疎慵
他年準擬尋松鶴歸日應能借竹籠

送君則林倅南還辛酉登科今為京尹主文


經筭便便玉價高帝城十載屢遊遨月中前度攀丹桂

天上今年種碧桃
燕市風塵情浩浩
吳帆烟水興滔滔
仙舟幸有金華客
共與哦詩飲濁醪

與胡古愚同行

閏三月七日城西訪友不過馬上口占

寒疾連朝避風雨
今晨一出復何如
扣門投刺意不愜
上馬逢人情有餘
饑鶴啄蟲行廣陌
垂楊飄絮汎污渠
暫經馬市緇塵滿
歸去蓬窓理舊書



燕石集卷六

欽定四庫全書

集部

燕石集卷八

詳校官編修臣曹錫齡

中書臣

劉源溥覆勘

覆校官編修臣吳壽昌

校對官學正臣卜維吉

謄錄監生臣劉本立

欽定四庫全書

燕石集卷七

元 宋 撰

律詩 七言

和杜德常萬歲山暮春

霧杳雲深日馭西
紅稀綠暗鬧黃鸝
雙娥有淚仍啼竹
四老無情謾採芝
遊冶喜逢三月閏
芳菲空度一春遲
誰家甲第歌聲咽
何處名園舞袖垂
祇有情懷似中酒
那能心緒及遊絲
少年笑我真痴絕
一日閒愁十二時

追賦苑主事南野亭 麗正門外

女牆不隔鳳城春，柳色危亭枕水濱。
夜城松風吹几杖，

曉蘭花露濕衣巾。
西隣池館存碑石，

清勝園

東里園林換

主人

萬柳園

得似夫君能曠達，百壺清酒日娛賓。

送崔時敏司獄省母汴中兼寄吳彥輝

六月一日

萬態峰前望白雲，暫因王事問晨昏。
渡頭橫濟瓜蔓水，歸騎直趨酸棗門。
阿母慈顏深有喜，寧馨陰德果無冤。
故人跂脚臨樽俎，為說相思入夢魂。

端午日雨霽暫出齊化門回入城遙面京西諸
山及市肆風景追憶延祐六年六月廿有二
日侍誠夫尚書兄初自江南還都亦經此路
仍值雨晴今十有五年矣感念疇昔因賦此

詩

官柳垂陰霽景鮮憶攜家具過通廬雕盤粃妝映珠幃
繡陌驛騶輝錦鷲上國繁華過陝洛中朝文物勝開天
由來幾度南柯夢惟有青山似昔年

柳人王道原遊吳楚至京師凡二十餘年著春
秋義成書除韶州路教授

方州一士恥孤陋老大挈舟辭楚鄉萬里周流蹤跡遠
半生著述鬢毛蒼侯門久客公車薦驛路榮歸祖席張
到日里閤爭餽賀儒冠稽古動輝光

直沽夜興

元統癸酉八月南使江浙

戍鼓聲催夕照低薰葭楊柳澹烟微偶因海浦聽吹篴
却憶京城聞搗衣戀闕豈無情戚戚別家那有思依依

傳聞大駕還都近，怪得寒風凜夕威。

東岡崇恩寺晚酌其僧一峯求詩

山門杉檜碧蕭森，步屨迴廊一徑深。
罷酒長風來北渚，按歌明月出東林。
幽軒晚立雲容濕，高閣晴登海氣侵。
忽報寒溝潮信到，可能重聽穎師琴。

過餘姚寄賈治安同知

秋深持節下鑾坡，吳越風烟入浩歌。
溪水通橋松作竇，山雲收雨石為窩。
避泥驕馬嘯寒草，過隴饑牛齧早禾。

別駕歸來應笑我驛程何事苦吟哦

慶元書事

鶯脰湖平好看山
結綺亭遠莫憑闌
帽沾江雨曉鬚濕
袖舉海風秋臂寒
天上仙槎來八月
雲邊商舶去三韓
蓬萊更訪長生藥
却擬乘桴事不難

台州郡治後山亭留飲席上走筆

孟冬短日到台州
勝境喜遇都賢侯
眼前丘壑太岑蔚
閣後臺榭仍風流
巾子峰高曉色近
淨香亭小寒光浮

徜徉儘可留朔客談笑不必存吳謳

永嘉江心寺留題

隔江孤嶼敞空門不似山林不似村雙塔晝深樟樹影
半階寒沁海潮痕連城客到詩常滿別島僧回粥尚溫
欲寄微軀恨無策暫時相賞慰羈魂

福建道中

北人不慣住炎方英蕩函邊藥裹香鼻到崇安試蘇合
舌過南劍漬栢柳朝寒命酒資調護晝暖披襟恐中傷

共喜我來當十月肩輿猶憇干陰涼

贈任大正御史于福州

十月一別太契濶兩月仍得相逢三世事茫茫不可料
交情翕翕誰能諳姑蘇臺前秋草遠浙江亭下寒雲酣
冬深却恐霜威重後會不得同清談

馬伯誠彥恂以繕寫經世大典成書授左衛教

授須次暫還吳興

幾年京國養疎慵詩似朝霞氣似虹天上書藏羣玉府

日邊人訪水晶宮
唐朝富麗詞臣盛
漢代隆平賦客工
政好清明事鉛槧
重來摘藻頌無窮

高麗人李穀字中甫
元統元年登乙科
為翰林檢閱官
明年被命使本國
宣諭勉厲學校制
書其行也贈之以詩

蓋蘇文後少武事
漬溝樓下有書聲
貢士來經鳴綠遠
登科去被牙緋榮
中朝分命新詔使
東人爭訝舊儒生
德音宣布聲教廣
遣子入學同趨京

莆田陳衆仲由國子助教提學江浙

送君有情忘別恨愧我無句攄幽懷固知湖山適吟嘯
乃與館閣成睽乖紫鳳天吳存曲折黃鐘大呂變淫哇
斯文自是專方面猶為我冠歎不諧

平坡訪謝草池二首

仙家祕館西山隈石磴乘馬能獨來山腰檜柏當晝暝
澗底桃杏爭春開設棋不作空置局貯酒常滿頻銜杯
道士誦詩久成聽不知斜日下荒臺

玉泉西畔昔慣往盧師東邊今始行山石聲確啣馬足
樹林陰翳藏禽聲座上主人談衆妙壁間圖畫教長生
所嗟祕境禁來往不敢題詩留姓名

懸畫八幅皆熊
經鳥伸之術

禮部主事劉文瑞父母慶八十壽

沂州老人八十強寧馨有官居議郎鸞鳳五華恩誥下
魚龍百戲壽筵張西京牛酒春無價南極星辰夜有光
昨日升堂親几杖毫眉三寸點秋霜

新城道中雷雨喜晚晴

震霆人馬俱辟易揮鞭不復能掩聽棗葉沉沉過凍雨
柳陌蕭蕭來晚風失馬急追憐從者負薪徒涉念衰翁
驛程亦有馳驅苦猶及殘陽一點中

送呂仲實僉憲廣西

得官嶺表衆所惡持憲廣西君獨榮士論翕翕似華袞
祖道粲粲皆簪纓榕葉曉看思禁柳杜鵑晨聽憶宮鶯
歸來鐵面如紅玉不盡論思獻納情

鑑湖水送烏希說

希說以至元丙子夏由史屬
代祀北岳濟瀆南至會稽臘

殘求贈言適賤尾臘文有鑑湖水之語遂為
題賦詩餞之予以至順癸酉使過紹興不得

一至湖上

至今歎然

鑑湖百頃生涼秋知章陳請太白遊子今乃能五月往
我昔不得一日留吳娃合曲風度舫越女浣紗雲滿頭
燕趙緇塵都洗盡荷花深處薦瓊舟

送張實夫覲省回漳州

赤嶺坡前春日遲楊柳橋下暮潮低閩中遊子歌相別
天上故人書漫題茉莉吹香來竹戶麝麝作隊過松畦

良田美樹還家樂昨日青林杜宇啼

送安伯寧由大名治中赴上沔陽知府

一違鷓鴣行中去兩度江河補外行
吏校遠迎茅步市旌麾先過漢陽城
民間魚稻富生理幕下賓僚多官情
我亦二毛思五馬臨風常為使君榮

襄陽楊萬戶命道士禱雨有應

雨華舊說隨車降天意曾因決獄回
鐵甲將軍今禱雨玉壺方士解呼雷
樊城麥穗千家熟峴首秧苗幾處栽

感應玄機有如此
轅門新政亦佳哉

左司丁貞夫號嵩巖

洛陽人

枝峯蔓壑燦烟霞
自古神仙就作家
天井穴深留石髓
貝多樹老放瑤華
山人索價遺蹤杳
王子吹笙去路賒
莫向風前賦招隱
紫薇花下鬢鬢髿

和王君實戶部早秋巡山韻

遠臨遼海近軍都
今代神臯異古初
萬乘省方嚴禁鑰
千官耀武肅郊居
祈年寺塔存唐像
利國河渠入漢書

賴是星郎解模寫吟餘胸次日清虛

送楊子宣尹鄆城

明時作邑重優游我為斯人抱隱憂巨室昂昂張虎翼
姦民澱澱沸魚頭朝衙召集鄉三老幕邸趨承郡督郵
利刃往年曾一試知君談笑已無牛

七月望日西山即景十二韻

朔土中元展墓辰暫時從俗出重闈秋光蕭颯無餘暑
野色虛明不動塵仙館舊時通輦路

昭廟宮西有
英廟別殿

官溝

佳處似江津

通惠廣源
風物類南方

郊扉亭榭皆沽酒石岸灣碕

半鬻薪見寺參差多白塔逢僧絡繹盡紅巾鳧茨映草

花輕小鴻茨遮萍大葉勻潔白芙蓉猶是夏淡黃楊柳

不如春偶隨漁艇方遊目忽見龍舟却愴神

英廟文宗
兩朝御舟

藏廣源
上別港

金水河寬風掠面玉泉山暗雨催人馬蹄不

憚平蕪遠鳥語常因密樹頻可惜痴頑攜子姪未能放

曠會親賓茫茫世網誰堪約負郭同為學稼民

濟南張侯至大二年奉御香禱旱歷山舜祠雨

應是年十二月也

武皇齋祓禱重瞳近侍含香解蘊隆灤水氣通雲漠漠
繡江波合雨濛濛螟蝗不待逢深雪牧守惟知問太空
自古精誠多感格誰云野語出齊東

送篤烈圖敬夫南臺御史時予居間

一從桂苑下瀛洲君寵難忘志未酬今戴豸冠辭上國
又分龍節向南州跋鱉應貽騏驎笑飛鴻亦有稻梁謀
道傍楊柳不堪折江上梅花相憶不

先兄正獻公墳所寒食自和氣門歸馬上賦

適野襟懷自豁然入城景物又堪憐御溝春水高於路
海岸風塵暗似烟醉客輕生馳騷衰痴兒薄行調嬋媛
徐驅返顧西山色自笑詩人嗜好偏

送范悅古赴江西憲掾

悅古名亭曲進士不第
掾江西憲久之以誣罷

去又中鄉舉會科場廢御
史辨其寃復為江西憲掾

丹桂凋零翠柏高吳船還又泛江濤鷺禽整翮仍堪擊
鷗鳥忘機自不勞曉陌行人折楊柳春城別館酌蒲桃

卷七
婵娟後夜東湖月莫向明時歎馬曹

於潛謝堯章松巢

濁世塵囂如洛水巢居故向萬松間
下窺震澤三江浪高揖錢唐九里山
虎魄餽糧應可畜兔絲牖戶若為攀
杏梁柱柱長安陌不直危枝一解顏

臨安劉子簡以至元二年觀光京師明年告歸
作詩送之

文昌殿古黑雲低光範門深白日迷
逢掖有時甘引去

丈夫何事苦分攜上林春去鶯猶囀南國晨征馬不嘶
多少憂端兼別恨烟江何處覓緘題

李重山都司號梅庭

愛梅大是清絕倫置之庭除尤可人寒影夜移青玉案
暗香晨裊白綸巾隴頭江上徒千里月地雲階少四鄰
更道廣平心鐵石可無新語慰花神

昌平縣解和斛之昂御史時巡歷京畿東道

向來按部指秋期子月登車我獨遲雙塔道傍觀俗處

金少日九人三言
卷七
百泉莊上卹災時烟昏導騎搖葫箒燈暗痴童下廢房
不聽謳歌聽愁歎何心工和壁間辭

澠州除夕憶京師諸公奉寄

豈不懷歸畏簡書無人袒跣鬻蒲那知年後得春氣
謾向天邊瞻斗樞一榻衾裯明楮袖五更簫鼓蹋鞦韆
屠蘇詰旦誰先飲鷓鴣黎明衆共趨纖手菜絲應不送
端門柑宴肯相須鳳城多少藏閭會一樣銀燈惜歲徂

元日又懷諸公自次韻

攬轡寒郊理簿書
明時不用伏青蒲
喜聞奠莢頒庭陛
驚見桃符映戶樞
長樂曉鐘紅叱撥
大明春殿紫氍毹
六街車馬魚鱗集
百弼衣冠鳥翼趨
幕省貴人辭瑣闥
晴窓獨客攬髭鬚
暮年勲業歸公等
莫歎紅塵急景徂

六日雨中聞詔赦將至復次韻

一札飛來寬大書
潞陽歸騎踏菅蒲
九天雨露開元化
列宿光芒拱北樞
時近春盤傳餅餠
雲昏午枕卧糴瑜
連朝吏士開尊飲
旦日官僚秉笏趨
葛亮有言垂往昔

陽球興嘆失斯須傳聞幾處園扉靜獄無勞趁暑徂
淮南潘子素持吳闕唱酬詩一卷見示偶七夕

久坐書懷次韻寄卷中諸友

悔拋蕙帳下巖阿老鬢飄蕭半闕富涉世情懷今日薄
立朝勲業古人多靜聞珠露零丹桂清愛銀灣漾白波
良夜賞心難寄遠定應同調製吳歌

予以延祐元年從先兄正獻公入汴始識彥輝
吳徵君是歲故中丞馬公伯庸令翰林學士

謝公敬德國子博士王君師魯鄉貢河南行
省迄今二十五年予再以按行至汴居監察
行院去徵君所居僅半里猶以公事未畢尚
遲於請見時馬公亦薨謝王在館閣感念存
歿賦唐律一首先遣持遺徵君正之

至元四年
戊寅

二十年前入汴州梵王仙館涉春秋家家庭院森湖玉
處處簾櫳映海榴金馬石渠傷遠別丘山華屋動新愁
誰憐閉著車中婦猶望元龍百尺樓

仲宣樓登眺

國家全盛似金甌江漢澄清控上游
帝子幾時臨北渚
庾公何處倚南樓雲來巫峽祠空在
霜落荆門樹自稠
持節重來紆四望孤懷別有凭闌愁

左司李重賢遠清亭

亭下盆池漾綠光紅粧翠蓋似橫塘
不須玉井十丈藕
自有鑑湖五月涼座上莫聞金鼎篆
尊前仍注碧蘭香
主人逸興幽人句多幸俱留百世芳

武昌近城阻風雨三日不得到城下遣興一首

山南僉憲之行

五月江風多自南停舟滯雨興難堪呂公磯送驚心浪
大別山凝撲面嵐北海酒尊空已久善和書冊遠誰探
妻兒不解窮通理看挂明朝十日颿

當陽道中

錄因襄陽

路指沮漳散馬蹄園林芳潤稱幽棲淺山有勢藏杉冢
細水無聲過稻畦病暍久忘河朔飲貪眠常惡汝南雞

莫嗟六轡多匆遽猶暇尋詩泚筆題

山中逢武當馮尹景仲入京以詩送之

卓午山頭樹影高豈期多幸此相遭
久嗟寒雁迷書問共訝秋霜點鬢毛
張緒猶如少年柳劉郎重看舊時桃
故人侍直金鑿密應向明時誦拔茅

景仲與歐陽學士同年故及之

過馬嘶山留題寺中

雞鳴山接馬嘶山萬壑晴雲井底看
湍澗縈紆五十度石梯犖确百千盤
光華固有周原重險阻其如蜀道難

題罷新詩動高興五湖何處水雲寬

四十八度脚不乾
行人繞到馬嘶山

均房山
中人語

山中漫賦題關平官舍

繡衣不為吟哦出詩料縱橫簇眼前巖鳥雜鳴諸部樂
石苔亂布五銖錢焚香乞水痴求雨刻木通泉巧溉田
尸位空言無所補寓情托物亦猶賢

七月三日喜至鄖縣山行兼旬至此始出

稻花香裡過琳宮一舸斜陽漢水東下馬已辭山麓葉

開軒仍見竹葱蘢畫簷不碍迎霜葉玉宇頻來處暑風
童御無知友朋遠滿襟幽思與誰同

太公遇文王圖

狂王喪心醉其上老叟避世居渭濱出獵初非取獸意
垂釣豈是求魚人千年茅土有終始一時際遇無比倫
韓彭烏合成俎醢三顧猶堪繼後塵

愛竹 所寓官舍有竹數叢

京華廿載看畫竹今見羣筍森階前錦綉初苞已挺特

筠粉半落尤清妍何人炎歊弄團扇有客風露為華筵
平安不待綱維報軒車未膏日周旋

章臺寺留題

高林過雨曉蒼蒼水木清華古道場亭子是誰開四五
招提緣此異尋常風聲蕭颯羣松翠日氣醺酣二麥黃
墟墓令人不怡悅何妨却茗進瓊觴

寺後園有巨松二
三百株中有歲寒

聯翠遠塵無垢諸
亭亭畔古冢甚多

荆門州治後惠養亭留題

亭在山麓

南直江城近可通東連郢樹暗無窮臺高先得瀛洲月
地陜難乘閬苑風雲射晴霞紅爛熳山經凍雨翠溟濛
惟餘蒙惠泉頭路猶在探竒夢寐中

蒙惠泉在州西
姚暢皆有詩

雨後利陽道中

二年四過山前路三度值雨難攀躋最憐綠水注深壩
不惜青驄污濁泥澤畔藕花怡旅况隴頭禾穗慰妻啼
豐登已是囊中物易得新詩掃壁題

寄賀徐復初江浙檢校

故人家住黃鶴樓三年不到鸚鵡洲紅塵面目事京局
清夜夢寐思林丘聳壑昂霄今老大唾壺談塵舊風流
傳聞調官赴吳會我為終夕喜不休

寄慰翰林謝敬德學士

故人昔佐湘陰州召赴館閣二十秋高文大冊有清譽
賦詩酌酒無白頭荷橐兩京久勞瘁行年六表空優游
一官不調竟無愠我為終夕悶不休

夷陵晚望峽口即景感懷十四韻

按部峽州

一握青天萬丈崖，長江束縛此中來。山形連導岷峨脉，
水戒明徵灑灑堆。疏鑿神功思禹載，戰爭遺迹歎秦灰。
濤翻澎湃朝噴雪，灘激砰訇夜吼雷。割據每能資霸業，
棄捐亦復到奴才。乾坤設險華夷判，名利輕生肝膽摧。
闕 匠操篙要厚賂，波神賜琬享冥財。兒時夢寐光陰速，
客裡登臨懷抱開。紅葉黃花為誰好，玄猿白鴈有餘哀。
百川逝水流無極，孤鳥長空去不回。昨日舟航辭白帝，
當年雲雨下陽臺。竹枝歌裡堪容與，人鮓甕邊難溯洄。

千里畫圖真妙甚，醉翁文字亦高哉。
遠遊政到離騷國，賦罷招魂試舉杯。

遠安留題

楚邊窮處蜀分疆，小邑幾為山所藏。
放火種畬今得趣，辟兵鑿穴舊堪傷。
每因巖壑起雲氣，少見日月開晴光。
我來問俗聊弭節，深林不敢久徜徉。

目送

目送孤鴻欲滅時，幽人懷抱有誰知。
茫茫往古青山在。

疊疊來今白髮垂陶令忘憂多嗜酒少陵逸興只吟詩
惟餘安樂窩中老笑俯塵寰看大碁

孝感紀異詩 并序

太原惠思忠信夫由汾州吏薦補山南憲府
從事檄下以父年登七袞難於遠行父趣之
曰吾方後兒從宦以亢吾宗顧吾方康寧母
他慮其速治裝信夫勉從之至元二年冬至
荆凡再閱月猶未供役復歸省見黃柑荔枝
諸果類非北土所有買得之饗以衣襪將餽
其父至則父已卒家人問曰若持荔枝來耶
信夫驚其弟告之曰父初歿時衆擗踊環哭
久而復甦止哭者曰我適夢到南中見兒餽
我果名荔枝我啜之風味非常兒今來矣言

既而卒信夫聞其事痛哭頓絕出所包果以薦蓋信夫山南啟行之時公易簣之夕實三年二月二十又八日也時人異其孝感予為紀其事仍系以詩

河東老父雪盈頭捧檄兒郎事遠遊
莫道襟懷如陸績直疑魂魄似黔婁
薦新禮在情相稱陟岵詩成淚莫收
理氣相關有如此不須身外強推求

逸老堂

九老仙都宮唐真人

臨水垂楊遶院松高堂仙容養疎慵
道存柱史五千字心在蓬萊第一峰
未可道遙空看鶴不妨勞動急呼龍

我慚不得金丹術塵滿衣襟抗俗容

時早設醮
禱雨未應

江上阻風

白山南還都

昨日痴坐庾公樓今晨祇過桑落洲連朝巨浪高似屋
萬斛大舸輕於鷗青山兩岸不可畫綠酒一尊能解憂
行年五十倦頰仰愁見京塵撲馬頭

高麗僧式上人遊兩浙江會提學黃晉卿句曲
外史茅山張伯雨好事者繪為文會圖

文章釋老誰爭雄昔人三語將無同已公茅屋見新句

匡廬蓮社追隨風名勝絕憐留翰墨笑談莫謂變虛空
雞林到日傳相詫杖錦歸來未是窮

是詩次黃韻

吏部侍郎杜弘道號西巖野逸

保下人

萬古西巖好地形憑高四望接英靈太行王屋千峰雪
碣石居庸一帶青山徑緣雲通略約野泉流月度坳陁
主人固有幽栖志同送孤鴻入杳冥

送錢思復下第還杭州分得秋字

陌上王孫壯氣道交鋒廟壘在朝頭擬來披腹排闥闔

空使乘槎犯斗牛
蟾府丹香應少待
鳳梭花樣肯旁搜
冬烘却是居停主
江上芙蓉莫怨秋

思復來會試主禮部侍郎秦不華魚

善家既而魚善考文故末章及之

正月二十六日監中習儀即景書懷

椒觴獻歲暖如蒸
收燈前後不復晴
風色料峭雪欲落
雲陰晃漾日半明
四郊未有花柳意
六館但聞絃誦聲
城南三月牡丹發
莫遣白頭愁裡生

陽明樓

崇真萬壽宮道士丁元善

道士由來不火食仙人況復好樓居
鏡湖秋水望不極禹穴晴嵐濃有餘
巖下茯苓供採藥窓前柿葉待臨書
紫鸞玄鶴應相遲會碾飈輪赴碧虛

初秋苦雨

白潦玄雲淨影涵漏天奚止說西南
毀垣到處疎籬當支厦何年大木堪
慄慄未須悲宋玉沉吟漫爾憶岑參
無窮世故靈臺小華髮蕭騷不滿簪

濟南張智夫八十詩雲莊有序

聞道仙翁樂事多，幾曾衰槁坐雞窩。
華峰月冷雲橫久，趵突泉甘酒熱過。
少壯爭詢三叟壽，光陰未盡百年歌。
太平生長仍終老，笑殺行兵馬伏波。

送葉仲輿令尹赴上鹽場司令

君君牛刀新發硎，閩中作宰慰編氓。
石崖鐫頌不盡意，樟木刻祠方稱情。
丹詔十行求善政，玉堂一老有諸生。
牢盆又比爰書苦，誰為長林歎不平。

時天子下詔議舉
守令仲輿已除故

不得與仲輿讀書作文且能治民至
大皇慶間皆從承旨姚文公遊故云

次韻蘇伯修侍御樊川遊春

霄漢春深鬢有華，離愁望眼一時賒。
裁詩不待灞橋雪，醉酒莫嗔韋曲花。
渭北樹陰晴靄鬱，終南雲氣暮週遮。
帝城咫尺居庸翠，誰道痴呆不念家。

我別長安四見秋，當時風景如夢遊。
含元殿下麥初老，興慶池頭波欲流。
三春柳蔭北軒井，千枝柏暗南坊丘。
而今祇是成追憶，疇昔無因得久留。

予以至正改元夏五備員行臺都事

僅長安兩旬赴召禁林而歸寓官舍北窓後井上有三春柳一枝同官樊時中寓東城南坊舍後古冢時見光

怪旁有千枝柏樹之
叢生者秦中多植之

卷七

送孫引進湖州同知

綿蕤何須魯兩生
紫髯落落稱華纓
泰壇導駕開徐步
文陛催班引大聲
一代世官周禮重
九重增秩漢恩榮
水晶宮裡蘋風起
北望紅雲是帝城

張女挽詩

女諱阿慶汝南忠武王第八女今翰林待制郝陵川開

尤工屬對十歲而逝元遺山續夷堅志紀其事

三生常侍玉宸君
想像文姬一樣人
露氣清凝仙掌夜

天葩秀吐上林春木蘭歌怨征行苦柳絮才高老大身

却是貞魂埋不得綵鸞同與駕颺輪

所屬對今畧附於後如睡思昏昏如醉

思閒心寂寂似禪心洗硯黑雲浮水面折花紅雨落牆頭滿地梨花三月暮隔牆楊柳兩家春秋水芙蓉粧鏡曉暖烟揚柳畫屏春關山明月子規魂花柳東風蝴蝶夢江頭鷗鷺不關名利也風波野水荆榛有底功勛承雨露驟雨翻空滌世間之塵垢飛虹飲海收天下之風雲

台州應翁八十號希有齋

老人鬚髮如秋霜深居海濱樂且康壽考何須菊潭水
神仙只在梅林陽五銖衣薄肌骨爽九節杖輕行步彊

我欲相期廣莫野痛飲共到無何鄉

梅林之陽老人所居也

告中寒食感事書懷

至正五年作時奉勅纂修宋史

少日讀書今白頭半生竊祿不知休
講筵深媿程楊學
史稿重遺班馬羞多事愁懷苦於病
久寒春意淡如秋
江南烟雨京華月間倚晴窓憶舊遊

婺源程弘道教經堂

其子名允時

聖訓行天似日星秦時晦日漢時明
半山老人壞正道
紫陽夫子集大成孝經尚欲化遐郡
論語還堪致太平

他日兒曹心醉後我知不羨遺金籛

送詩僧泐季潭江南

有清溪稿

方外何嘗浪得名士林高處學遷鶯遠公能重陶元亮
老漢常陪石曼卿日暮碧雲追雅致陽春白雪有餘聲
江南烟雨樓臺好儘意推敲不用驚

紀行述懷

扈從上京之行

陪扈灤京媿未曾馬瘠兒病苦凌兢龍門湍息山徑雪
偏嶺風淒石瀨水倏忽雨暘天叵測迂疎道路事難憑

侍臣爭笑馮唐老不向明時獻技能

凍雨晚晴自成物門歸院馬上口占

碧山繚繞晝陰垂雲濕官城雨濕衣芳草遠含春意態
微陽閒弄晚光輝灤河委曲經千里魏闕嵯峨壯九圍
滿目鬱蔥佳氣在莫從陳迹訪依稀

送王仲方淮東廉使

薰風殿閣舜琴張睿念求賢治遠方灤水繡衣朝浥雨
淮孺白簡夏飛霜九天星直三台近六轡路增千里長

拔薤抱兒君素志瓊花開處煮茶香

宣文博士周伯溫世家都陽別墅有坡先世樹
梅千株其郡志載宋時守居多梅有亭名玉
雪坡伯溫愛之亦以名其亭

薄俗妖妍莫競春萬株清氣照乾坤神仙身在藐姑射
居士夢入羅浮村寫物更無和靖句懷賢宜占謝公墩
久知佳境因人勝何必登亭對酒尊

喜歸大都玉署

玉署蕭然一事無，漫陪鑾馭到行都。
白痴祇對鰲峰石，清供唯觀海月圖。
野曠有情開紫菊，禁園無數列黃榆。
輪蹄迫塞通衢隘，明日揚鞭出坦途。

送趙大本赴西臺御史分得塵字

釋褐由來第幾春，綵衣重襲繡衣新。
地連羌熨民皆幸，天助風霜筆有神。
驄馬豈期多避路，都亭無用苦埋輪。
致君勲業爭先睹，應歎遺賢滿後塵。

送王彬叔赴西書吏

廬江憲府昔曾經作掾聞君有此行
滯皖諸山倚天峻
淮淝二水得霜清
蒼鷹自向秋風擊
丹鳳還依曉日鳴
簡牘賢勞好珍重
靈臺明處是雲程

宣城黃山汪公仲雲松樓

江東勝士高起樓
坐對萬松雲氣浮
流水桃花非世外
小山叢桂為誰留
繁華競逐移春檻
貸殖空名千戶侯
唯有清標供撫玩
棟梁霖雨付悠悠

早春遣懷

金史四八八
卷七
百尺危橋路稍平
新年邂逅一經行
池臺半入荒殘景
觴咏渾非少壯情
祇見晴波羣浴馬
未聞芳樹亂啼鶯
相親賴有西山色
常似連屏照鳳城

張德謙壽松石

木精山骨舊相親
鬼匠臨摹大逼真
霜老蒼龍潛委蛻
月明寒玉暗傳神
立園預卜長年兆
苔蘚難埋後夜春
信是堅貞同氣類
望秋蒲柳謾成塵

燕石集卷七